

Flores mit vber. Das vbrige bleibt zurück als ein dunkel grüne Massa, ganz feurig auff der Zungen/ gleich als ein Sal Tartari, wann es außgelauge wird mit Regenwasser/ so gibt es eine Graß-grüne solution, welche so sie nicht bald in ein Salt coaguliret wirdt / scheidet sich die Grüne von dem Nitro fixo, vnd fällt als ein zart roht Pulver zu Boden / welches / so es abgefüßt vnd getrucknet wird / von ein Bran biß auff 10. oder 12. eingeben / macht solches linde sedes vnd vomitus, besser als ein zubereytes Antimonium Vomitivum, dann der Galmen vnd Zinck güldischer Natur seyn / wie im Vierdten Theil bewiesen wird / das weiße lixivium, davon die Grüne gefället / kan in ein weiß Salt / dem Sali Tartari gleich / coaguliret werden / so man aber die Grüne solution coaguliret / ehe sich die Grüne von dem Nitro gescheiden hat / so bekommt man ein schön hoch-grünes Salt / viel feurer als ein Sal Tartari, damit sonderbahre Dinge in Alchymia können gethan werden / welches hieher nicht gehöret. So nun jemandt solches grüne fixe Salt in Alchymia zu gebrauchen machen wil / darff er so viel Mühe nicht auffwenden / erst einen Spiritum auß der mixtur zu distilliren / sondern kan nur zu 1. Theil Galmen 3. oder 4. Theile guten Salpeter mischen / vnd solche mixtur in einen guten Tigel / in einen Wind-Ofen zusammen kochen / so lang / biß sich das Nitrum grün von dem Galmen gefärbet hat / dann außgegossen / vnd das grüne güldische Salt daron geschieden / vnd so gut gebrauchet als man weiß.

Will